

**Quistione à bocca posta da Mattea Lacave
à nome di Femu a Corsica**

Oggettu : Per una suluzione di u cufittu cù l'ARS

O Sgiò Presidente,

Dipoi una quindicina di ghjorni i salariati di u STC sò in greva per dinucià l'attitudine di u Statu in u so ricusu d'appieca u protoccu d'accordu ch'ellu hà firmatu cù l'organizzazione sindacale in u 2009.

Apruffitemu di sta dumanda à bocca per assicurà torna u STC è tutti quelli chì l'anu raghjuntu, di u nostru sustegnu in stu cumbattu ghjustu ch'ellu porta dipoi più di dui anni, per un serviziu di salute à prò di tutti i so avventori.

Rammintemu à tutti chì l'Assemblea di Corsica hà vutatu una muzione, à l'unanimità di nuvembre 2010, per fà appieca da l'auturità cumpetente stu protoccu è per mandatà u Presidente di l'Assemblea è u Presidente di l'Esecuttivu à u scopu di neguzià i punti di stu protoccu cù l'ARS è u Ministeru di a Salute. Sò parechji sti punti :

- A revisione du u cuefficiente geugrafficu
- U finanziamentu di e missione d'interessu generale
- L'equilibriu trà settore publicu è privatu
- A ricustruzione di l'uspidale d'Aiacciu
- A prutezione di u patrimoni u spidaleru corsu
- L'evuluzione di l'EHPAD
- A cuuperazione trà i stabilimenti publichi di a salute
- U ritardu strutturale di pettu à l'infrastructure uspidaliere
- A furnazione paramedicale

Oghje, ci avvedimu chì a situazione si hè imeghjurita assai per via chì l'ARS ùn tene manc'à pena a so parolla, vale à dì assestà una vera cuncertazione è un veru travagliu di pettu à i punti di u protoccu.

Unu di i punti di a divergenza ferma quellu di u cuefficiente geugrafficu; tutt'ognunu sà chì u Ministru Xavier Bertrand avia datu u so accunsentu per ch'ellu sia fissatu à 15%. L'Assemblea di Corsica avia vutatu dinù à l'unanimità una muzione, u 30 di marzu 2007, per l'appiecazione di un percentuale di 15% per i so stabilimenti di salute. Sò stati parechji i pulitichi di Corsica à cumunicà nantu à a necessità d'ottene stu percentuale chì permette d'assicurà l'interessi di i malati.

Tandu ùn si pò capisce mancu appena è ne mancu accettà st'attitudine di disprezzu di u Statu chì face nice d'ùn capisce. Cerca è trova argomenti fallaci per discredità u movimentu suciale è cuntinueghja à a bella megliu senza fà minimu casu à i voti di l'Assemblea di Corsica.

Un statu chì in u prima tempu cunferisce nisun' missione à u direttore di l'ARS è chì avà ne face a sola persona abilitata à risponde à e rivendicazione è e dumande legitime di i sindacalisti. Parenu fole!

Avemù vistu chì dopu à 10 ghjorni di cunflittu avete ricevutu una delegazione di u STC , chì v'avete dinù sustenutu a so azzione, è chì vi site impegnati ver di una soluzione di rigulamentu di stu cunflittu.

Ancu s'è a cullettività ùn hà micca cumpetenza in u duminiu di a salute, a nostra respunsabilità di pulitichi ferma d'esse attentissimi è primurosi di l'appiecazione di e nostre decisione. Stu cartulare di a salute hè propiu troppu impurtante per lascià crede à i corsi ch'è no simu ind'è quì in l'impussibilità d'agisce.

A l'ora induv'ella hè scritta sta dumanda ùn si sà ancu l'evuluzione ch'ellu pò piglià stu cunflittu. A nostra dumanda serà doppia :

- Sè andemu ver di un esciuta di u cunflittu, vi dumandemu di mette tuttu in ballu per assicurà u rispettu di l'ingagiamenti di u Statu è d'assucià tutti i gruppi per seguità u cartulare.

- S'è u cunflittu s'impeghjurisce, tocca à noi, eletti isulani, à inizià una dimarchja di mediazione, è vi dumandemu di mette l'Assemblea di Corsica in core à tutte i negoziati , assucendu tutti i gruppi, per truvà una suluzione à stu prublema maiò.